

二經同卷

陶一

太上洞玄靈寶上品戒經

太上玄一真人說三途五苦勸戒經

太上洞玄靈寶上品戒經

爾時

天尊以開皇元年七月一日午時於西那王

國鬱察山中浮羅之境香桑林所授太上道

君智慧上品大戒法文于時道君受戒首體

投地迴心十方思念

三尊是時諸天仙衆騰空而來龍車虎駕鳳
輦鸞輿翠旄羽扇碧霧彩雲仙花寶節赫奕
光明嗚咩咩音樂鏘鏘騰空降綵來詣道
場仙人玉女旋繞燒香步虛讚詠稽首瞻仰

四一

天尊微笑面目放光說戒度人聞者消殃
天尊敕諸善男子善女人天上曹官每月一
日令二童子降於人間察其善惡錄人是非
行善者天曹上校其善簿造惡者地府下注
其惡名命終之後善者受福惡者受殃是故

勸諸人等每歲正朝元日身服方色鮮衣會
其道場名書竹帛上奏天曹以知一年已身
行善每月一日於靈宮觀所聽戒以知一月
結緣修善於說戒處男子女人和會同坐心
標名號各自靜志坐下聽人聞戒悟道證無

生忍詣此法門者應是玉女應是金真體合
道氣相帶仙容於妙言中正信於教願聽
天尊說戒地祇獻珍乃有發心天女忍辱仙
人星冠耀首月帔光身執持供養稽首因說
十上願白衆宣陳

一者願捨身肉飼餓禽獸二者願身八脂澤
燒燈續明三者願施力輟功濟人負重四者
見貧窮裸露願惠食濟衣五者值遇病人願
施湯藥六者見人所要願濟時須七者憂苦
之人隨事令喜八者獄囚殺戮身願代刑九
者懷孕婦人早願分解十者邊疆征鎮早得
歸還發此十願兩淚悲泣而白

天尊弟子罪障誠深願聞妙戒尊師憂悲不
樂垂淚告言男子女人障業尤重出離妙法
大事因緣吾當欲開普度含識根基識淺知

復奈何嗚呼痛哉虛度一生沈淪六道吾爲
聽衆說此戒文覺悟迴心歸依正道有罪者
當懺悔無罪者默然聽

天尊告太上道君曰今當勸戒開悟羣生爲
諸男女解災却患請福度命拔諸苦根生者

見道身脫八難死者得樂不歷三塗託報人
天受勝尊貴修齋求道轉輪聖王皆當一心
請奉十勸戒諦受勿忘思念在心莫相亂神
默然靜聽

第一勸敬三寶供養法師講說經文養生教

善行爲人範賢教高才榮貴門閭光顯家族
第二勸寫經書令人讀誦博聞妙讚世世聰
明言義開通宣揚章句

第三勸於靈觀修福建齋諸味甘饌供養賢
聖報茲高貴衣食自然

第四勸施香油然燈徧照見世芳盛清潔聰
明容眸絕倫天姿高秀

第五勸施尊師仙衣法服令人在世長雅逍
遙不墮邊夷常生中國家承冠冕男女端嚴
第六勸諸男女孝養父母恭敬親疎撫弱接

強愛下安上見世受報子姪賢良

第七勸濟病人飲食湯藥慈悲救療最上福田爲大醫王受勝尊貴

第八勸施貧窮輟己衣食令得飽暖延命安存見世門榮多饒家富

第九勸於他人莫懷妬嫉長行繫念莫作冤家捨去毒心遇逢歡喜

第十勸造天尊聖像供養或有厄難或爲死亡投苦遇災皆當救護

天尊告言此十勸進要戒當信奉行善惡業

緣必當獲報居世富貴笑他貧賤者必貧賤
報居世美貌笑他醜陋者必醜陋報居世聰
明不教人者必愚癡報居世康健笑他病患
者必滯病患報居世不信道教笑於經典者
必頑嚚報居世侵奪他夫壻者必小寡報居

世誘他婦者必鰥獨報居世發心爲夫婦者
不同生人道報居世好殺生命者必夭傷短
壽報是故勸諸人等行善善報行惡惡殃抵
敵不通無拔度者人有一心含藏六識行善
行惡遇境逢緣達慧閉情真門不動當證仙

道復說六情戒上品中人應當開悟

一者眼無廣瞻亂諸華色亡睛失瞳視物目
極於其眼根能制光明仙人出現於世
二者耳無亂聽混於五音傷神敗正惡聲啼
吟於其耳根能制音樂仙人出現於世

陶一

四

三者鼻無廣豐勿俱雜氣臭腥氛亂傷神動
意於其鼻根能制香積仙人出現於世
四者口無貪味脂薰雜類六腑犯違五臟脾
肺於其舌根能制法喜仙人出現於世
五者無慾搖情身不受觸精氣乃安守心自

最於其觸根能制定慧仙人出現於世
六者心無變亂意不攀緣本性空寂湛然能
堅於其諸緣能制法門仙人出現於世
天尊言此六根者身之大患來生男女雖受
人形六情不純未見經教不聞法音皆不自
覺沈迷罪門受命短促不盡天命長處惡道
甚可哀憐故說是戒開度人天善心敬信歸
命洞玄情恬神靜報命長延太極真人聽受
六戒證得六通歡喜踊躍歌詠讚文
天尊言曰座下善男善女聞此讚歎持戒不

闕當證真道若人讀誦此戒命終之後不被
惡業所拘當得罪滅又曰人有病起不善養
身妄想成災攀緣作病多不覺悟當說是迷
百病之中略舉十等欲聞病本聽者靜心
蠱毒殺人是一病 憎他願死是二病

陶一

五

好色壞德是三病 追念舊惡是四病
不受諫喻是五病 了戾自用是六病
教人傷人是七病 强奪他物是八病
好自怨訴是九病 威勢迫脅是十病

此十種病若願愈者當用藥治信方必差

體弱性柔是妙藥

行寬心和是妙藥

近德遠色是妙藥

不取非財是妙藥

救禍濟難是妙藥

扶持老弱是妙藥

受辱不怨是妙藥

忿怒自制是妙藥

遠嫌避疑是妙藥

心靜意定是妙藥

說此妙藥與病相應不用心治俄然受死遷
流時至遺語世人其言曰

大聖平等心

說是真仙戒

欲令一切衆

同會萬福堂

有福擬天仙

說誦靈寶戒

日朝月望時

請昇師子座

端身調正氣

和音說妙經

哀愍下界人

不信上妙戒

還漂流苦海

無生妙樂天

持受是戒經

即入仙聖位

各各默然聽

分分發道心

一者曆數末

自當世界昏

二者布正法

惠合應乾坤

三者順風雨

善開甘露門

四者愍枯骨

神符却返魂

五者上世祖

福佑下代孫

六者多惡性

變易生善根

七者翻短壽

延命得長存

八者曠劫罪

咸皆奉聖恩

九者解脫相

除障免疵痕

十者漸積量

得成無上尊

真人教戒曰何不修持今正是時寸陰可惜
勿棄流光宜秘密妙行證者乃知

勸戒頌曰

人命已消亡 喻若膏中火 四大如枝葉
五蘊似花果 盛年當勤學 豈得存吾我

開一

六

福盡神識散 宜朦地獄坐 上聖畏沈淪
尋道度斯禍 大地及萬物 倚伏各有靈
終始待劫數 福盡天地傾 往返於五道
去來更死生 愚夫不信法 罪痛常自嬰
若欲度斯患 歸命太上經 演說上妙戒

受之爲身寶

就學恒苦耽

治身恨不早

皆當披幽牘

倏忽催人老

吾故及弱齡

棄世急學道

臥盡天竺則

却與世無干

天尊說是戒已一切大會諸天天王諸天天

衆諸國國王諸國國衆王妃綵女太后宮人

八部龍神十方衆聖梵王天帝三界衆真五

方帝君四維神主如是衆等不可具名聞說

戒經皆證真道盲者見物癡者能言跛者能

行聾者得聽大地患者皆悉瘳除地獄停酸

水離鬼道時有五千學士文藻談天擢國良

賢欲求冠見迴心敬道稽首歸依

天尊慈悲登時拔度各授玉簡普賜金冠法
服仙衣諸天捧施清蹊放曠碧落逍遙服氣
餐霞乘龍控鶴大眾歡喜歌讚清虛空裏飛
仙標名祕錄雲中引接指視天門悟道證真

闕一

七

靜居常樂敬經之者信受奉行

太上洞玄靈寶上品戒經